

平

固

志

平

圖

志

光緒己丑季夏

劍南王氏開雕

平回志序

毓秀少嬰疾病，足迹未嘗越鄉國。其後益屏處深山，與人事疎遠。當其時，海內烽燧四起，材武之士咸思有以自效。顧獨守其羸瘵，頑鈍之軀，手一編以終老，竊自比散木、怪石之委翳墟莽，無所用於世，而亦瞖然不自知，求爲世用爲可笑也。然爾時常從先師龔九曾、王螺洲兩先生遊，兩師皆不樂用世，特以憂

國之忱託於文章，故得竊聞其緒論，而當事諸公於螺洲師尤時以書札往還諮商。

國計師獨時時稱湘陰左公之賢，以爲有古大將風。計其時文襄尚居幕僚也。曾文正公旣平江南，嗣聞東靖閩浙，西定

回疆皆出文襄之勲始歎師言爲知人然亦無從究其設施
丁亥之冬有友人宦游自西歸者出平回諸奏牘暨陝甘士
人所記述見示且屬爲編輯成書夫以不諳世務之胸而貿
然欲任載筆之事扣槃揣籥以爲日其不見嗤於人者幾何
顧毓秀以衰年喪其二子家居鬱鬱得此藉資排遣且樂得
討論文襄之事業用謹依舊冊次其年月刪其繁蕪勉竭百
晝夜之力而成之蓋回之發難糾結種類與漢民尋讎凶殘
特甚其勢較粵賊之起於烏合者爲牢固難破也其始多忠
勇公奉

命往勦方將肅清陝疆而遽以戰歿於是回氛益熾甘肅新
疆皆騷然矣嗣典軍者迄不得其要領而泰西諸夷伺中國

多故羣起爲難議者將擬棄新疆而專事海防文襄公獨以爲新疆經

聖祖

高宗兩聖所開創恃以固西陲近者諸夷惟俄最強其壤實邊新疆苟棄此不顧是啟俄人之侵軼而示諸國以弱東西受制首尾跋扈水戰又其長技海防恐未可專恃孰與先固西邊使俄夷懾于

國威則東南可徐圖耳於是排眾議而起合軍與餉皆一身任之

朝命甫下人人皆爲公危又西土苦寒諸將校多不願往公獨毅然率其二三同仇提師由秦踰隴以達關外察賊之情

偽以定勦撫五六年間雷驅席卷遂舉萬里雕敝之疆掃盪
漸除以還之職方伊犁久爲俄據

朝廷遣使與約各畫舊疆而守而俄人有違言公時駐肅州
乃調集各軍親出哈密以臨之戰有備矣會有

詔徵公還而俄亦遂斂手就議卒歸我伊犁公所議於新疆
建行省設義學以誘教回民子弟疆理田畝及善後諸政則
盡付僞撫劉公踵而成之今且蒸蒸臻富庶服禮教丕變於
華風焉然則文襄所樹立匪特紆

朝廷西顧之憂抑亦貽回民以萬世之賴蓋公之處事務固
根柢與物一推誠信每克一城必移民以實之嚴兵以衛之
始議再進故已復之地不聞再陷賊之就撫者察其材力可

用聽入伍籍一同叙功受賞如願歸農畝爲授田廬牛種使
安生業故其歸誠也若脫陷阱之險投慈母之懷而安有反
側哉則其將校士卒之效死樂用更可知已而又能持以臨
幾之警敏任人之專一故程功似迂而收效實捷也獨憶往
者粵寇之興度支告絀秉鈞者方將事權算亟徵輸以濟
國難而吾九曾師獨創爲蠶農固本之議冀以諷諭當途人
多以爲迂闊不可用然東南之亂且遲之十餘年而後定今
觀文襄負謗議以任鉅艱謀出於萬全而利規於遠久其深
固不搖之氣用意多有與九曾師相爲表裏者而又參酌於
螺洲師之籌畫以操縱張弛而準於古人伐畔柔服之義卒
使荒徼萬里之外咸讐服於

朝廷之威信天下始曉然嚮所稱爲迂闊者苟本其精誠果毅以達於用其老謀深識固遠勝於緣飾苟就媮取一切之爲而毓秀獨悲吾九曾師發憤著書徒垂空文資志以沒曾不及一親見文襄之業爲快也書用編年例起同治元年訖光緒十三年分三志曰志陝西者二卷曰志甘肅者四卷曰志新疆者二卷綜八卷凡回亂之始末撫勦之方略粗具焉而一以文襄爲宗文襄奏牘悉出親手絕浮飾故所錄爲詳自餘死事諸臣及偏師之勝雕剿之捷其勞不可沒皆得備書間有一事所記各異始兩存之以傳疑焉事有詳畧而無去取將待裁于史氏亦猶待材者宗桷根臬之用大小畢具惟聽匠者之采擇云爾光緒己丑秋七月柏壘山人楊毓秀

平回志叙

國朝用兵大且久者如平三藩征兩金川勦白蓮教匪以十數而以平粵逆爲最甚繼粵逆而起者如平捻匪平川賊不一役而以勦叛回爲最甚回匪之平其用兵力殫財賦曠日持久然後成功則與平粵逆相埒當其中外交訐南北繼叛是皆生靈劫運所值不可得而逃譬如人家失火東頭撲滅西頭復着大水齧堤址此處補築未就而彼處則又衝決也所賴會左諸公大張撻伐克奮威稜用力固勤其功亦已偉矣粵捻匪之就殄也王君鼎丞亦纂刊有書而平回一役惜無書焉楊君子堅吾鄉之名宿也博極羣書雅負著作其爲文近派桐城遠祖韓歐久爲當世所推許歲丁亥得平回文

續序
五
牘就訪事實參以耳聞撰爲平定陝西回匪志二卷平定甘肅回匪志四卷平定新疆回匪志二卷夫回匪至唐代肅間雜居中土閱今千數百年生育長養種類日蕃我

皇上一視同仁待如赤子然一闕於順治五年再叛於乾隆四十六年要皆旋興旋滅未嘗有久稽

天誅歷十數年然後掃烟氛而殄醜類若今日者可不謂難矣哉吾聞回之爲人高頽深目類皆悍鷙有力械鬪警殺往往而然然順治間則假號明藩乾隆間則回與回鞏同治以來回竟與官民構難誘煽蠢動蔓延數省若陝西若甘肅若新疆官民交悴幾於原野厭肉血流川谷孰非撫馭乖方失策於先而二三桀黠者如任老五馬化澁輩乃得從中激

成胎爲禍始。夫亂之初生，一二人之力，可以弭變。及其後則敗壞糜爛，不可收拾。幸倚恃

聖天子之靈，而元戎宿將，運籌決策，堅忍以底於有成。自回紇附唐以來，未有創鉅痛深若斯之甚者也。今回民從善者，復得洗心革面沐我

皇仁，而前此枕戈浙矛艱險備歷，諸人願無傳焉。其何以詔來茲警覆，輒貽後人以龜鑑也。是書之作，其亦烏可湮沒也乎。光緒十四年歲次戊子仲夏月望日東湖星樵鄒永煌序

平回志卷一

太湖王志沂

東湖楊毓秀子堅編纂

受業長陽張榮澤同校

姪楊存澤

蓬溪蓬萊山館刊

志陝西上一

回紇自唐平安史之亂留駐內地種類蔓延四域實肇始關輔受土納賦與科目登仕版

朝廷一視同仁與編氓無異而回則歲時婚喪與一切習尚歷千餘年猶仍舊俗用自區於漢民以故漢回錯處閒釁數開結黨尋仇械鬥劫殺往往而有官吏難於切究彌縫改釋

習為故常咸同之際粵賊捻匪南北交訂回民乘機搆難自

陝而甘延及關外南北諸城相率以叛遂啓俄夷之覬覦糜

爛者萬數千里雖回性悍猾難制原其首禍未始非撫馭之

乖方也會伊中原維廓清金陵反正乃鼓全勝之氣悉湘淮精銳

萃天下財賦專制一方攻勦撫綏然且竭十餘年之經營始

漸就安輯用力亦勤矣陝省大荔渭南之回世居渭北沙苑

咸豐十一年河南巡撫嚴樹森以汴省為粵捻諸賊往來要

衝患之樹森故渭南人習知回俗強而樂效死使人至陝募

渭涇原回勇六百人赴汴為親兵資扞禦頗賴其力同治元

年樹森移撫湖北旋里展墓率之歸而以屬諸團練大臣張

芾極言回勇之力編入團伍足稱勁旅回民明習戰陣自此

始二月粵賊自雒竄秦武關不守西安戒嚴陝西巡撫瑛稟慮標兵不可恃與張芾謀舉鄉紳募勇丁防南山要隘遂檄長安紳知府梅錦堂以十八厥之眾守子午峪自玉山以西屬焉渭南紳訓導趙權中以沙苑之眾守箭谷自玉山以東屬焉權中奉檄卽趨省城謁芾備言回勇難馭芾不謂然而權中歸卽募丁壯具糗糧軍裝五日而辦於是率鄉團五千渡渭而南自箭谷至少華設七汛所實無一回民也四月癸丑朔有回目馬世賢馬四元者率五百人歸附權中稱奉團練大臣檄募本教人助守且出檄以示權中留置閒處當是時粵賊屢犯渭南而牧虎關七盤嶺等處有逃兵導寇潛入其隘遂失權中知事不濟乃馳告各汛諭馬四賢等皆退守

渭水渡口。諸回聞寇至，遂不待遣，各散歸。行至華州之小張邨，回數十人，強斫民竹爲軍械。邨民鬪逐之，斃其二人。餘遁逸秦家邨。邨固回堡，遂勾結其黨三邨堡，欲與邨民構難。謀洩，己巳，小張邨人亦糾合大張邨、赤水鎮、魏家灘十餘邨堡，近萬人，期先發以攻之。華州回知勢不敵，挈其老弱涉渭而北，寄居沙苑回巢。遂煽言三州縣民傳帖，約於三日內齊發，將盡殲我族類。回於要衝伺得漢民，縛之歸，搜衣中，果得傳帖如所云。其實華回僞作也。於是眾回聞之，響應而影從矣。回巢之巨者，在大荔曰王柯邨，曰喬店，曰羗白。在渭南曰禹家莊，曰倉渡，曰邸家莊。界於華荔渭者曰乜家灘。其餘星羅棋布，不下數百邨堡。其回目之悍者，赫明堂、任老五、馬世賢。

洪興馬龍馬四元也代榮也代恩耶元魁大瓜蛋哈哈娃首
禍者則赫明堂任老五也兩人者咸豐七八年間嘗倡亂雲
南未果遂逃至倉渡潛於禮拜寺造軍械旗幟謀不軌各集
回皆聽命焉王柯郵羌白鎮與大荔之八女井鄰井民素強
悍稔知回之將叛也甲戌合眾萬餘謀殲回富紳李樹德聞
而往解之且與回議和回佯許之井民信之遂散其眾不數
日事起井民驟不及備皆束手受屠而樹德乃僅以身免是
日粵賊以河防密不得渡遂陷渭南知縣曹士鶴與其
皆罵賊死於是粵賊由華州出潼關趣陝州矣先是趙權中
守渡口與粵賊相持聞回覺急馳歸請鄉紳與回善者往排
解丁丑鄉紳同回目七八人就權中約和約未成有回丁馳